

BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
ZASTUPNIČKI DOM
Broj: 04-011-37/98
Sarajevo, 27. 4.1998. godine

Z A P I S N I K

8. sjednice Zastupničkog doma Parlamentarne skupštine
Bosne i Hercegovine održane 27. travnja 1998. godine u Sarajevu

Sjednica je počela sa radom u 11,00 sati.

Sjednicom je predsjedavao Slobodan Bijelić, predsjedatelj Zastupničkog doma Parlamentarne skupštine BiH.

Nakon što je utvrdio da postoji kvorum za punovažno odlučivanje, prisutan 31 zastupnik, 12 zastupnika iz entiteta Republika Srpska i 19 zastupnika iz entiteta Federacija Bosna i Hercegovina, predsjedatelj je predložio slijedeći:

D N E V N I R E D

1. Donošenje zaključka o poštivanju Ustavom propisane ravnopravnosti jezika i pisma, odnosno o obsvezi dostavljanja materijala na jezicima i pismima svih konstitutivnih naroda Bosne i Hercegovine;
2. Usvajanje Zapisnika sa 7. sjednice Zastupničkog doma Parlamentarne skupštine Bosne i Hercegovine;
3. Razmatranje i usvajanje Prijedloga Proračuna Bosne i Hercegovine za 1998. godinu;
4. Glasanje o Prijedlogu zakona o uvjetu i načinu postupka mjerodavnih državnih pravosudnih tijela u svezi sa kažnjavanjem ratnih zločinaca;
5. Davanje suglasnosti na sporazume:
 - a) Sporazum o gospodarskoj suradnji između Bosne i Hercegovine i Republike Slovenije,
 - b) Sporazum između Vijeća ministara Bosne i Hercegovine i Vlade Republike Slovenije o prijevozu osoba i stvari u međunarodnom cestovnom prometu,
 - c) Sporazum između Vijeća ministara Bosne i Hercegovine i Vlade Republike Turske o međunarodnom cestovnom prometu i
6. Zastupnička pitanja.

U raspravi o predloženom dnevnom redu sudjelovali su: Zlatko Lagumdžija, Ahmed Aličić, Husein Mandžuka, Mediha Filipović, Sejfidin Tokić, Mustafa Pamuk, Branko Simić, Haris Silajdžić i Boro Bosić.

Prijedlog Zlatka Lagumdžije da Zastupnički dom donesene zaključke povodom događaja u Drvaru, Derventi, Stocu, Žepču i Bukovici, što bi po njegovoj ocjeni moglo utjecati na sprovođenje Daytonskog sporazuma i povratak izbjeglih i raseljenih u svoje domove, nije prihvaćen.

Prijedlog Ahmeda Aličića da se u dnevni red sjednice uvrsti inicijativa za donošenje zakona za izbjegle i raseljene osobe na nivou Bosne i Hercegovine, nije prihvaćen.

Prijedlog Huseina Mandžuke da Vijeće ministara pripremi izvješće o boravku delegacije Vijeća ministara u Švedskoj i dostavi Zastupničkom domu na razmatranje za narednu sjednicu, je prihvaćen.

Prijedlog Medihe Filipović da se u dnevni red sjednice uvrsti inicijativa za pokretanje interparlamentarnih razgovora Bosne i Hercegovine i R. Hrvatske u funkciji obveza preuzetih iz Daytonskog sporazuma je prihvaćen.

Prijedlog Medihe Filipović da se dnevni red sjednice dopuni zaključkom o podršci međunarodnoj zajednici na čelu sa Europskom unijom i gospodinom Kukom za mirno rješenje krize na Kosovu, nije prihvaćen.

Prijedlog Sejfidina Tokića da se na današnjoj sjednici Zastupničkog doma razmotri aktualna situacija u BiH u kontekstu najnovijih pojava nasilja prema povratnicima i slobodi kretanja nije prihvaćen. Međutim, zastupnik je prihvatio objašnjenja koja su u svezi s ovim pitanjem iznijeli kopredsjedatelji Vijeća ministara Boro Bosić i Haris Silajdžić. Zaključeno je da Vijeće ministara za narednu sjednicu Zastupničkog doma dostavi izvješće o aktualnoj političkoj situaciji u Bosni i Hercegovini sa posebnim osvrtom na pojave nasilja protiv povratnika i slobode kretanja.

Prijedlog Sejfidina Tokića da se u dnevni red sjednice uvrsti izbor članova Komisije za ispitivanje pojava međuentitetskih malverzacija i kriminalnih radnji je prihvaćen.

Nakon što su iscrpljeni prijedlozi za izmjene i dopune dnevnog reda, predsjedatelj Slobodan Bijelić je za sjednicu predložio slijedeći:

D N E V N I R E D

1. Donošenje Zaključka o obveznom upućivanju materijala zastupnicima na jeziku i pismu konstitutivnog naroda kojemu pripada;
2. Usvajanje Zapisnika sa 7. sjednice Zastupničkog doma Parlamentarne skupštine Bosne i Hercegovine;
3. Prijedlogu zakona o uvjetu i načinu postupka mjerodavnih državnih pravosudnih tijela u svezi sa kažnjavanjem ratnih zločinaca;
4. Prijedlog zakona o izvršenju Proračuna institucija BiH i međunarodnih obveza BiH za 1998. godinu;
5. Davanje suglasnosti na sporazume:
 - a) Sporazuma o privrednoj suradnji između Bosne i Hercegovine i Vlade Republike Slovenije,
 - b) Sporazuma između Vijeća ministara Bosne i Hercegovine i Vlade Republike Slovenije o prijevozu osoba i stvari u međunarodnom cestovnom prometu,

c) Sporazuma između Vijeća ministara Bosne i Hercegovine i Vlade Republike Turske o međunarodnom cestovnom prometu;

6. Inicijativa za pokretanje interparlamentarnih razgovora Bosne i Hercegovine i Republike Hrvatske u funkciji obveza preuzetih iz Daytonu;

7. Izbor članova Komisije za ispitivanje pojava međuentitetskih malverzacija i kriminalnih radnji i

8. Zastupnička pitanja.

Prijedlog dnevnog reda jednoglasno je usvojen.

AD – 1. Donošenje Zaključka o obaveznom upućivanju materijala zastupnicima na jeziku i pismu konstitutivnog naroda kojemu pripada

U raspravi su sudjelovali: Slobodan Bijelić, Sejfudin Tokić i Ahmed Aličić.

Nakon rasprave Zastupnički dom je jednoglasno usvojio zaključak o obaveznom upućivanju materijala zastupnicima na jeziku i pismu konstitutivnog naroda kojemu pripada.

Obvezuju se stručne službe Parlamentarne skupštine Bosne i Hercegovine i Vijeća ministara Bosne i Hercegovine da realizuju ovaj zaključak.

AD – 2. Usvajanje Zapisnika sa 7. sjednice Zastupničkog doma Parlamentarne skupštine Bosne i Hercegovine

Predsjedatelj je konstatovao da zastupnici nisu primili prijedlog zapisnika sa 7. sjednice Zastupničkog doma i predložio da se usvajanje zapisnika sa 7. sjednice uvrsti u dnevni red naredne sjednice Zastupničkog doma.

A – 3. Prijedlog zakona o uvjetu i načinu postupka mjerodavnih državnih pravosudnih tijela u svezi sa kažnjavanjem ratnih zločinaca

U raspravi nije niko sudjelovao.

Zastupnički dom je prihvatio Prijedlog zakona o uvjetu i načinu postupka mjerodavnih državnih pravosudnih tijela u svezi sa kažnjavanjem ratnih zločinaca.

AD – 4. Prijedlog zakona o izvršenju Proračuna institucija BiH i međunarodnih obveza BiH za 1998. godinu

U raspravi su diskutirali Vehid Šahinović, Nedžad Branković, Husein Živalj, Spasoje Albijanić, Halid Genjac, Sejfudin Tokić, Sead Hasanhodžić, Ivan Šarić i Ahmed Aličić.

Zastupnik Vehid Šahinović je na Prijedlog zakona podnio slijedeće amandamane:

Amandman I

U stavci 6. Ministarstvo civilnih poslova i komunikacija dodati: “Sredstva za implementiranje općinskih izbora u oba entiteta 250.000 KM”.

Obrazloženje:

Implementiranje lokalnih izbora u općinama oba entiteta ide uz dosta poteškoća u jednom broju općina. To je naročito slučaj gdje se izabrani vijećnici, odbornici još uvijek nisu vratili u svoje opštine i žive kao izbjeglice, raseljena lica, odnosno prognanici na području jednog ili drugog entiteta. Odlasci na zasjedanje skupština zahtijevaju određena materijalna sredstva. Zbog toga, a i cijeneći da je interes države Bosne i Hercegovine podupiranje ovog procesa implementacije, predlažem da se u posebnoj stavci predvide sredstva za ove namjene.

Amandman II

Pregled prihoda Proračuna Bosne i Hercegovine 1,2. i 3. ukupno premjestiti prije stavki Operativni troškovi.

Obrazloženje:

Metodološki jedino ispravno je da se prvo navedu izvori i obim prihoda, zatim namjena i struktura rashoda.

Amandman III

Preispitati članak 14. stavak 1. Zakona o izvršenju Proračuna Bosne i Hercegovine za 1998. godinu posebno, jer ne može Vijeće ministara utvrđivati svojim aktom sva prava i njihov obim za sve korisnike budžetskih sredstava, npr. plaća i dr. Ovo iz razloga da se očuvaju kompetencije Skupštine, odnosno Administrativne komisije koja treba da raspravlja o ovim pitanjima. Kada se govori o ličnim dohodcima, shodno zaključku i dogovoru na Predsjedništvu predlažem da ova skupština donese zaključak da sva lična primanja zaposlenim u institucijama Bosne i Hercegovine se zadrže na nivou prošle godine.

Zastupnik Nedžad Branković je na Prijedlog zakona podnio slijedeći amandman:

U grupi operativnih troškova A8 ostali korisnici umjesto stavke rashoda Proračuna koja glasi:

“Ostale institucije.....1.000.000.-“

predlažem izmjenu sa slijedećim tekstom

“Javne korporacije BiH i ostale institucije.....1.000.000.-“

Obrazloženje:

Isključiva ovlaštenja institucija BiH po Aneksu 4. je uspostava i funkcioniranje zajedničkih i međunarodnih komunikacija i uspostava međuentitetskog transporta. Izvršenje ovih funkcija je po Aneksu 9. predviđeno putem javnih korporacija BiH i za realizaciju ovih poslova treba predvidjeti određene troškove. To bi podrazumijevalo i izradu projekata za međunarodne, infrastrukturne koridore gdje pripada i BiH. Kao što znate Bosna i Hercegovina je pridružena onim državama kroz koje prolazi Koridor 5.

Istovremeno je predložio da Predsjedništvo BiH dostavi Zastupničkom domu spisak međunarodnih organizacija za koje će se plaćati kotizacija, kako za one gdje je BiH članica, tako i za one u koje treba da se učlani, a odnosi se na stavku Rashoda pod A2 – Kotizacija za međunarodne organizacije – 3.000.000 KM.

Zastupnici Halid Genjac i Vehid Šahinović su predložili Zastupničkom domu da povodom datih amandmana i sugestija i prijedloga iznesenih u raspravi usvoji slijedeće zaključke:

- Zastupnički dom podržava odluku Predsjedništva BiH o tome da se sredstva predviđena za lična primanja zaposlenih u institucijama Bosne i Hercegovine u Prijedlogu ovog proračuna zadrže na nivou iz prošle godine.

- Da se amandmani koji su podneseni na tekst Prijedloga zakona o izvršenju Proračuna institucija BiH i međunarodnih obveza BiH za 1998. godinu dostave Predsjedništvu BiH koje će sadržaj tih amandmana imati u vidu prilikom izrade rebalansa Proračuna.

Zastupnički dom je usvojio predložene zaključke.

Nakon rasprave Prijedlog zakona o izvršenju Proračuna institucija BiH i međunarodnih obveza BiH za 1998. godinu je usvojen sa 29 glasova za i 2 uzdržana glasa.

AD – 5. Davanje suglasnosti za:

a) Odluku o ratificiranju Sporazuma o privrednoj saradnji između Bosne i Hercegovine i Vlade Republike Slovenije

U raspravi nije niko sudjelovao.

Zastupnički dom je dao suglasnost na Odluku o ratificiranju Sporazuma o privrednoj saradnji između Bosne i Hercegovine i Vlade Republike Slovenije.

b) Odluku o ratificiranju Sporazuma između Vijeća ministara Bosne i Hercegovine i Vlade Republike Slovenije o prevozu lica i stvari u međunarodnom drumskom saobraćaju

U raspravi nije niko sudjelovao.

Zastupnički dom je dao suglasnost na Odluku o ratificiranju Sporazuma između Vijeća ministara Bosne i Hercegovine i Vlade Republike Slovenije o prevozu lica i stvari u međunarodnom drumskom saobraćaju.

c) Odluku o ratificiranju Sporazuma između Vijeća ministara Bosne i Hercegovine i Vlade Republike Turske o međunarodnom drumskom saobraćaju

U raspravi nije niko sudjelovao.

Zastupnički dom je dao suglasnost na Odluku o ratificiranju Sporazuma između Vijeća ministara Bosne i Hercegovine i Vlade Republike Turske o međunarodnom drumskom saobraćaju.

AD – 6. Inicijativa za pokretanje interparlamentarnih razgovora Bosne i Hercegovine i Republike Hrvatske u funkciji obveza preuzetih iz Dejtona

U raspravi je sudjelovao Sjefudin Tokić. Predložio je da se inicijativa prihvati i da se istovremeno zaduži Komisija za međunarodna i vanjska pitanja Zastupničkog doma

Parlamentarne skupštine BiH, da sačini platformu i osnove na kojima bi se vodili razgovori.

Prijedlog zastupnika Tokića nije prihvaćen.

Zastupnički dom je poslije provedene rasprave prihvatio Inicijativu za pokretanje interparlamentarnih razgovora Bosne i Hercegovine i Republike Hrvatske u funkciji obveza preuzetih iz Dejtona.

AD – 7. Izbor članova Komisije za ispitivanje međuentitetskih malverzacija i kriminalnih radnji

U raspravi su sudjelovali Sejfudin Tokić, Branko Simić, Sead Hasanhodžić, Ivo Lozančić, Ahmed Aličić i Dragomir Kerović.

Za članove Komisije predloženi su zastupnici:

1. Sejfudin Tokić,
2. Dragan Đurić,
3. Branko Simić,
4. Ahmed Aličić,
5. Vehid Šahinović,
6. Ivan Vrankić
7. Stjepo Pranjić.

Zastupnički dom je jednoglasno prihvatio izbor članova u Komisiju za ispitivanje pojava međuentitetskih malverzacija i kriminalnih radnji.

AD – 8. Poslanička pitanja

Zastupnik Mediha Filipović, postavila je slijedeće pitanje:

- Da li je istina da Bošnjaci, vojni obveznici koji žive u entitetu Republika Srpska bivaju pozvani na vojne vježbe iako po Dejtonskom sporazumu su oslobođeni bilo kakvog učešća u vojnim vježbama, pet godina. Znači Bošnjaci, vojni obveznici koji žive u entitetu Republika Srpska, da li ih pozivaju u vojsku s namjerom da ih šalju na Kosovo?

Zastupnik Behrudin Salčinović postavio je slijedeće pitanje:

- Na prošloj sjednici Zastupničkog doma postavio sam pitanje šta je sa Zakonom o javnoj korporaciji u željezničkom saobraćaju?

Drago mi je da je između ove dvije sjednice potpisan međuentitetski sporazum, međutim, zakona još nema na dnevnom redu. A ovo pitanje bih još dopunio jednim pitanjem, šta je sa zakonom o javnoj korporaciji PTT promet?

Zastupnik Dragomir Kerović postavio je slijedeće pitanje:

- Gospodo predsjedatelji, ja bih tražio od vas, da vi putem svojih službi pred ovo najveće zakonodavno-pravno tijelo Bosne i Hercegovine na slijedećoj sjednici prezentirate nova izborna pravila i odgovorite šta je sa formiranjem stalne izborne komisije. Mi do sada imamo Privremenu izbornu komisiju. Šta je sa izborom stalne izborne komisije i šta je sa izbornim pravilima OSCE-a. Hoćemo li se formirati, kako će ići, to je predmet Daytonskog sporazuma i predmet ove skupštine.

Zastupnik Sejfudin Tokić postavio je slijedeće pitanje:

- U proteklih mjesec dana, ja sam postavio dva pitanja koja se tiču inozemne politike. Jedno se odnosilo na ministra Jadranka Prlića i njegovo ministarstvo o tome šta je njegovo ministarstvo poduzelo nakon govora predsjednika Republike Hrvatske Franje Tuđmana, u toliko prije što je išla jedna reakcija koja nije imala podršku državnih organa niti snagu državnih organa, to je bila reakcija predsjedavajućeg Predsjedništva.

- Drugo pitanje upućeno je pismeno kopredsjedatelju Vijeća ministara o načinu, formi i tretmanu prilikom prijema delegacije Turskog dijela Kipra. S obzirom da je Kipar međunarodno priznata država i s obzirom da Bosna i Hercegovina u toku implementiranja Sporazuma i te kako mora paziti s kim državni dužnosnici razgovaraju, jer to može imati implikacije i na samu sudbinu države Bosne i Hercegovine. Ja bih podsjetio navedenu gospodu da bi bilo vrlo značajno da se i o tim pitanjima dobije odgovor.

Sjednica je završila s radom u 13,40 sati.

Magnetofonski snimak sjednice čini sastavni dio ovog Zapisnika.

PREDSJEDATELJ
ZASTUPNIČKOG DOMA
Slobodan Bijelić